

## WILLIAMS, DANIEL (1878 - 1968), gweinidog (EF) ac awdur

**Enw:** Daniel Williams  
**Dyddiad geni:** 1878  
**Dyddiad marw:** 1968  
**Priod:** Annie Bartley Williams (née Griffith)  
**Rhiant:** Anne Williams  
**Rhiant:** Richard Williams  
**Rhyw:** Gwryw  
**Galwedigaeth:** gweinidog (EF) ac awdur  
**Maes gweithgaredd:** Crefydd; Eisteddfod; Llenyddiaeth ac Ysgrifennu  
**Awdur:** Richard E. Huws

Ganwyd 17 Mehefin 1878 yn fab i Richard Williams, ' gweithiwr prin ei geiniogau yng nghreigiau'r Penmaen ', a'i wraig Anne, ym Modnant, Llanfairfechan, Sir Gaernarfon. Addysgwyd ef yn ysgol genedlaethol y pentre, a threuliodd ddwy flynedd yn ysgol Cynffig Davies, Porthaethwy, cyn iddo gael ei dderbyn yn ymgeisydd am y weinidogaeth Wesleyaidd yn 1901. Gwasanaethodd am flwyddyn gyngolegol yn Llanbedr, Meirionnydd, cyn dechrau ar ei astudiaethau yng ngholeg ei enwad yn Headingley, Leeds. Ar ôl cwpláu gyrfa lwyddiannus yno anfonwyd ef i Benisa'r-waun, cylchdaith Caernarfon, lle'r arhosodd am gyfnod o dair blynedd. Ar wahan i ddwy flynedd, 1907-08, yng ngyrchdaith Manceinion, treuliodd ei holl amser yn y weinidogaeth yn gwasanaethu ardaloedd yng ngogledd Cymru gan gynnwys Aberffraw, Corwen, Dolgellau, Llanfyllin, Llangollen, Penmachno, Rhyd-y-foel a'r Wyddgrug, lle'r arhosodd am saith mlynedd. Ymdeolodd o'r gwaith cyflawn a mynd yn uwchrif yn 1943, a gwneud ei gartref ym Mhrestatyn, ond dychwelodd i'r gwaith rheolaidd yn 1948, a bu'n arolygwr cylchdaith Llangollen am flwyddyn, gan ymddeol drachefn a byw yn y dref honno, nes iddo symud i Hen Golwyn yn 1952.

Yr oedd yn bregethwr dawnus a phoblogaidd a chyhoeddodd *Gwerslyfr ar Efengyl Marc* yn 1934. Ond yn ogystal â'i gyfraniad sylweddol i fywyd crefyddol Cymru, yr oedd Daniel Williams yn adnabyddus fel llenor a hanesydd safonol. Cyhoeddodd bump o lyfrau plant: *Cario'r post a storïau eraill* (1932), *Dyrmaid o yd* (1924), *Llwyn y brain* (1930), *Pant y gloch* (1932) a *Plant y pentre* (1925), a chyfrannodd yn gyson i gylchgronau hynafiaethol. Yr oedd yn eisteddfodwr brwd ac enillodd gadair am bryddest yn Eisteddfod y Sulgwyn, Pen-y-bont-fawr, Maldwyn, 1927, a'r wobr gyntaf ar y prif draethawd, 'Teithi meddwl Ann Griffiths', yn Eisteddfod Talaith a Chadair Powys, 1932. Cafodd lawer o lwyddiant llenyddol yn yr Eisteddfod Genedlaethol a rhwng 1939 ac 1947 enillodd saith gwobr am draethawd neu ysgrif ar destunau amrywiol iawn. Yn 1952 fe'i hanrhydeddwyd pan estynnwyd gwahoddiad iddo draddodi'r ddarlith flynyddol yng Nghymanfa'r Eglwys Fethodistaidd a gynhaliwyd yn Llandeilo.

Yn 1909 priododd ag Annie Bartley Griffith, wyres i'r Archdderwydd ' Clwydfardd ' (David Griffiths, 1800 - 1894) yng nghapel Ebeneser, Llandudno, a ganwyd iddynt bedwar o blant, tri mab ac un ferch. Bu farw 17 Mawrth 1968 yn ei gartref, Bron-y-garth, Wynn Avenue, Hen Golwyn, ac yn dilyn gwasanaeth preifat yng nghapel Bethesda, Hen Golwyn, llosgwyd ei weddillion yn Amlosgfa Bae Colwyn.

### Awdur

**Richard E. Huws**

### Ffynonellau

*Dyddiadur yr Eglwys Fethodistaidd*, 1969, 29-30

*Y Gwyllydydd Newydd*, 4 Ebrill 1968

*The Liverpool Daily Post*, 19-20 March 1968

*The Minutes of the Annual Conference Methodist Church* (1968), 194-5

J. Henry Martin a J. Bernard Sheldon, *Ministers and Probationers of the Methodist Church, formerly Wesleyan, Primitive and United Methodist, with the Appointments 1861; revised to Sept. 1st 1963* (Llundain 1964), 331

Daniel Williams, 'Fy ngalwad i'r weinidogaeth', *Y Winllan*, 107 (1954), 201-5

Mairwen a Gwynn Jones, *Dewiniaid Difyr* (Llandysul 1983)

gwybodaeth gan Alun W. Francis, Caernarfon

### Dolenni Ychwanegol

Wikidata: Q20732783

**Dyddiad cyhoeddi:** 1997

**Hawffraint Erthygl:** <http://rightsstatements.org/page/InC/1.0/>

Preifatrwydd a Chwciis  
Hawlfraint  
Y Prosiect  
Cymorth  
Cysylltu

LGC  
NLW

LLYFRGEL  
THE NATION



Yn ddiwyd gan  
Llywodraeth Cymru  
Sponsored by  
Welsh Government